

"OLDE MOLEN" A YEGA SU FASE FINAL

Durante un conferencia di prensa Dialuna atardi, directiva di "De Olde Molen" a informa nos cu e proyecto aki a yega den su fase final.

"De Olde Molen" lo worde habri probablemente dia 15 di Maart. Directiva a bisa probablemente como cu nan kier tur cos cla, prome cu e portanan di e mulina habri pa publico.

Cu esaki esfuertonan di dos residente di nos isla, Sres. Paalmans y Woudenberg, lo keda coroná cu éxito.

Nos lectornan ta corda con tres aña pasá e idea a surgi cerca e dos señoresnan aki, un aña despues e N.V. a worde fundá y un aña mas laat, esta aña pasá, construccion di e edificio a cuminsa na Palm Beach.

Awor aki Palm Beach di Aruba a worde enriquecé cu un proyecto, cu ta unico den e area di Caribe, y cu indudablemente lo forma un gran atraccion turistico pa Aruba.

E directiva ta consisti di Sr. C. Turkenburg y T. Paalmans, siendo cu e N.V. tin tres comisario, Sres. Charley Morales, C. van Dam y C. Croes.

E costonan total di construccion y pa e mobiliario ta Fls. 170.000.— di cual Fls. 110.000.— a worde bendi na shares.

E capital ta completamente Arubiano y e shares ta parti den tur categoria di e comunidad Arubano.

Ora "Olde Molen" habri su portanan, 15 persona lo haya trabao aya, di cual 13 ta Arubiano. G. J. Woudenberg, lo ta general-manager y lo ta encargá a la vez cu bar, mientras cu F. Geusebroek lo ta cheffkok.

"Olde Molen" lo ta habri di 10'or di mainta te 3'or di madrugada.

Un bon noticia ta cu e cushina lo ta habri te 11'or di anochi pa cumindanan completo y te 2'or di madrugada pa snacks y cumindanan lihé.

E edificio mes a worde gevef na un manera sobresaliente y especialmente anochi e mulina ta un bista fantástico.

P'aden e mulina ta consisti di tres piso y tur tres ta representa un ambiente, cu te awor tabata desconoci na Aruba, un ambiente hulandes antiguo.

E prome piso tin un bar y restaurant, e di dos piso tin un restaurant y e di tres lo bira den futuro un lugar especial pa bebe un aperativo etc.

E cuminda ta hulandes y frances-internacional y e prijs lo cai entre esunnan di stad y esunnan di Aruba Caribbean Hotel.

Actualmente D.O.W. ta trahando un iardin dilanti di e mulina pa completa e proyecto aki.

21 Februari 1962